

Exposicion na Biblioteca Nacional

EEFJE Van Der Straten ta invitabo: "Para keto un rato y contempla e maraviyanan di Dios"

ORANJESTAD (AAN) -- Cinco aña pasa Eefje van der Straten-van Twillert a cuminsa desaroya su talento como artista plastico, despues cu el a sigui diferente curso di pintura y dibuho localmente. Cerca artistanan plastico di e taya di Maria Latorre, Hubert Booi, Gloria Laconte y Gustave Noel, Eefje van der Straten a siña diferente tecnica, cu awor aki e ta aplica na su propio estilo, segun su pensamiento y inspiracion creativo.

Bao number "Para keto un rato y considera e maraviyanan di Dios" Eefje v/d Straten a presenta su prome exposicion di pintura, dialuna 22 di februari na Biblioteca Nacional, cual apertura a bira un exito rotundo.

Tabata un satisfaccion inmenso pa Sr. Hubert Booi y Sra. Maria Latorre, cu ta dos di e instructornan cu a comparti cu sra. van der Straten nan conocimiento, pa wak e

forma con el a desaroya su habilidad pa pinta, refleha den un trabao autentico y unico.

Kico a inspira Eefje v/d Straten "Para keto un rato"?

"Mi a scoge pa para keto un rato for di Job 37:14 cu ta bisa: -Para keto un rato y considera e maraviyanan di Dios-. Esaki ta asina special pasobra ta worde spera di nos prome pa para keto un rato y for di eynan lo considera e maraviyanan di Dios", segun e artista ta expresa.

A traves di e exposicion e artista ta purba di mostra un par di Dios su maraviyanan na Aruba. E ta exhorta tur cu kier wak e berdadero maraviyanan di Dios bay cana den mondi y "para keto un rato". E exposicion di Eefje van der Straten lo keda habri te cu dia 5 di maart den oranan di atencion pa publico.

Riba combinacion di potret un impresion di e interesante exposicion aki.

